

大慧普覺禪師書卷第二十六

武六

宋徑山能仁禪院住持嗣法慧日禪師臣益聞上進

答江給事少明

人生一世百年光陰能有幾許公白屋起家
歷盡清要此是世間第一等受福底人能知
武六
慚愧回心向道學出世間脫生死法又是世
間第一等討便宜底人須是急著手脚冷却
面皮不得受人差排自家理會本命元辰教
去處分明便是世間出世間一箇了事底大
丈夫也承連日去與參政道話甚善甚善此

公歇得馳求心得言語道斷心行處滅差別
異路覲見古人脚手不被古人方便文字所
羅籠山僧見渠如此所以更不曾與之說一
字恐鈍置他直候渠將來自要與山僧說話
方始共渠眉毛廝結理會在不只恁麼便休
學道人若馳求心不歇縱與之眉毛廝結理
會何益之有正是癡狂外邊走耳古人云親
近善者如霧露中行雖不濕衣時時有潤但
頻與參政說話至禱至禱不可將古人垂示
言教胡亂穿鑿如馬大師遇南嶽和尚說法

云譬牛駕車車若不行打車即是打牛即是
馬師聞之言下知歸這幾句兒言語諸多方多
少說法如雷如霆如雲如雨底理會不得錯

下名言隨語生解見與舟峯書尾杜撰解註

山僧讀之不覺絕倒可與說如來禪祖師禪
底一狀領過一道行遣也來領子細看過却
勝得前日兩頌自此可已之頌來頌去有甚
了期如參政相似渠豈是不會做頌何故都
無一字乃識法者懼耳間或露一毛頭自然
抓著山僧痒處如出山相頌云到處逢人薦

面欺之語可與叢林作點眼藥公異日自見
矣不必山僧註破也某近見公頓然改變為
此事甚力故作此書不覺縷縷

答富樞密

季申

示諭叢歲知信向此道晚年為知解所障未

有一悟入處欲知日夜體道方便既荷至誠
武六
不敢自外據欵結按葛藤少許只這求悟入
底便是障道知解了也更別有甚麼知解為
公作障畢竟喚甚麼作知解知解從何而生
被障者復是阿誰只此一句顛倒有三自言

爲知解所障是一自言未悟甘作迷人是一更在迷中將心待悟是一只這三顛倒便是生死根本直須一念不生顛倒心絕方知無迷可破無悟可待無知解可障如人飲水冷煥自知久久自然不作這般見解也但就能知知解底心上看還障得也無能知知解底心上還有如許多般也無從上大智慧之士莫不皆以知解爲傳倡以知解爲方便於知解上行平等慈於知解上作諸佛事如龍得水似虎靠山終不以此爲惱只爲他識得知

解起處既識得起處即此知解便是解脫之場便是出生死處既是解脫之場出生死處則知底解底當體寂滅知底解底既寂滅能知知解者不可不寂滅菩提涅槃真如佛性不可不寂滅更有何物可障更向何處求悟

武六三
入釋迦老子曰諸業從心生故說心如幻若離此分別則滅諸有趣僧問大珠和尚如何是大涅槃珠云不造生死業是大涅槃僧云如何是生死業珠云求大涅槃是生死業又古德云學道人一念計生死即落魔道一念

起諸見即落外道又淨名云衆魔者樂生死
菩薩於生死而不捨外道者樂諸見菩薩於
諸見而不動此乃是以知解爲儕侶以知解
爲方便於知解上行平等慈於知解上作諸
佛事底樣子也只爲他了達三祇劫空生死
涅槃俱寂靜故旣未到這箇田地切不可被
邪師輩胡說亂道引入鬼窟裏閉眉合眼作
妄想邇來祖道衰微此流如麻似粟真是一
盲引衆盲相牽入火坑深可憐愍願公硬著
脊梁骨莫作這般去就作這般去就底雖暫

拘得箇臭皮袋子住便以爲究竟而心識紛
飛猶如野馬縱然心識暫停如石壓草不覺
又生欲直取無上菩提到究竟安樂處不亦
難乎宗杲亦嘗爲此流所誤後來若不遇真
善知識幾致空過一生每每思量直是巨耐
以故不惜口業力救此弊今稍有知非者若
要徑截理會須得這一念子曝地一破方了
得生死方名悟入然切不可存心待破若存
心在破處則永劫無有破時但將妄想顛倒
底心思量分別底心好生惡死底心知見解

會底心於靜厭鬧底心一時按下只就按
處看箇詰頭僧問趙州狗子還有佛性也無
州云無此一字子乃是權許多惡知惡覺底
器仗也不得作有無會不得作道理會不得

向意根下思量卜度不得向揚眉瞬目處探
武六

根不得向語路上作活計不得颺在無事甲
裏不得向舉起處承當不得向文字中引證
但向十二時中四威儀內時時提撕時時舉
覺狗子還有佛性也無云無不離日用試如
此做工夫看月十日便自見得也一郡千里

之事都不相妨古人云我這裏是活底粗師
意有甚麼物能拘執他若離日用別有趣向
則是離波求水離器求金求之愈遠矣

又

竊知日來以此大事因緣爲念勇猛精進純
一無雜不勝喜躍能二六時中熾然作爲之
際必得相應也未審寐二邊得一如也未如
未切不可一向沈空趣寂古人喚作黑山下
鬼家活計盡未來際無有透脫之期昨接來
諺私慮左右必已耽著靜勝三昧及詢直閑

公乃知果如所料大凡涉世有餘之士久勝
於塵勞中忽然得人指令向靜默處做工夫
乍得胷中無事便認著以爲究竟安樂殊不
卷六
知似石壓草雖暫覺絕消息奈何根株猶在
寧有證徹寂滅之期要得真正寂滅現前必
五
須於熾然生滅之中蓦地一跳跳出不動一

絲毫便攬長河爲酥酪變大地作黃金臨機
縱奪殺活自由利他自利無施不可先聖喚
作無盡藏陀羅尼門無盡藏神通遊戲門無
盡藏如意解脫門豈非真大丈夫之能事也

然亦非使然皆吾心之常分耳願左右快者
精彩決期於此廓徹大悟胷中皎然如百千
日月十方世界一念明了無一絲毫頭異想
始得與究竟相應果能如是豈獨於生死路
上得力異日再秉鉤軸致君於堯舜之上如
指諸掌耳

又

示諭初機得少靜坐工夫亦自佳又云不敢
妄作靜見黃面老子所謂譬如有人自塞其
耳高聲大呌求人不聞真是自作障難耳若

生死心未破日用二六時中冥冥蒙蒙地如
魂不散底死人一般更討甚閑工夫理會靜
理會閑耶涅槃會上廣額睂兒放下屠刀便
成佛豈是做靜中工夫來渠豈不是初機左
右見此定以爲不然須差排渠作古佛示現
今人無此力量若如是見乃不信自殊勝甘
爲下劣人也我此門中不論初機晚學亦不
問丈參先達若要直箇靜須是生死心破不
著做工夫生死心破則自靜也先聖所說寂
靜方便正爲此也自是末世邪師輩不會先

聖方便語耳左右若信得山僧及試向閑處
看狗子無佛性話未說悟不悟正當方寸擾
擾時謾提撕舉覺看還覺靜也無還覺得力
也無若覺得力便不須放捨要靜坐時但燒
一炷香靜坐坐時不得令昏沈亦不得掉舉
昏沈掉舉先聖所訶靜坐時纔覺此兩種病
武六
現前但只舉狗子無佛性話兩種病不著用力
派遣當下枯枯地矣日久月深纔覺省力
便是得力處也亦不著做靜中工夫只這便
是工夫也李參政頃在泉南初相見時見山

僧力排默照邪禪瞎人眼渠初不平疑怒相半驕聞山僧頌庭前柏樹子話忽然打破漆桶於一笑中千了百當方信山僧開口見膽無秋毫相欺亦不是爭人我便對山僧懺悔此公現在彼請試問之還是也無道讓上座已往福唐不識已到彼否此子參禪喫辛苦更多亦嘗十餘年入枯禪近年始得箇安樂處相見時試問渠如何做工夫曾爲狼子偏憐客想必至誠吐露也

答李參政別紙

漢老

副樞密頃在三衢時嘗有書來問道因而打葛藤一上落草不少尚爾滯在默照處定是遭邪師引入鬼窟裏無疑今又得書復執靜坐爲佳其滯泥如此如何參得徑山禪今次答渠書又復縷縷葛藤不惜口業痛與剗除孟六^七又不知肯回頭轉腦於日用中看話頭否先聖云寧可破戒如須彌山不可被邪師熏一邪念如芥子許在情識中如油入麴永不可出此公是也如與之相見試取答渠底葛藤一觀因而作箇方便救取此人四攝法中以

同事攝爲最彊左右當大啓此法門令其信入不唯省得山僧一半力亦使渠信得及肯離舊窟也

答陳少卿

李任

承諭欲留意此段大事因緣爲根性極鈍若果如此當爲左右賀也今時士大夫多於此事不能百了千當直下透脫者只爲根性太利知見太多見宗師纔開口動舌早一時會了也以故返不如鈍根者無許多惡知惡覺驕地於一機一境上一言一句下撞發便是

達磨大師出頭來用盡百種神通也奈何他不得只爲他無道理可障利根者返被利根所障不能得啐地便折曝地便破假餽於聰明知解上學得於自己本分事上轉不得力所以南泉和尚云近日禪師太多見箇癡鈍人不可得章敬和尚曰至理亡言時人不悉彊習他事以爲功能不知自性元非塵境是箇微妙大解脱門所有鑑覺不染不礙如是光明未曾休廢裏劫至今固無變易猶如日輪遠近斯照雖及衆色不與一切和合靈燭

妙明非假鍛鍊爲不了故取於物象但如捏目妄起空華徒自疲勞枉經劫數若能返照無第二人舉措施爲不虧實相左右自言根鈍試如此返照看能知鈍者還鈍也無若不回光返照只守鈍根更生煩惱乃是向幻妄上重增幻妄空華上更添空華也但相聽能知根性鈍者決定不鈍雖不得守著這箇鈍底然亦不得捨却這箇鈍底參取捨利鈍在人不在心此心與三世諸佛一體無二若有二則法不平等矣受教傳心俱爲虛妄求真吉六

覓實轉見參差但知得一體無二之心決定不在利鈍取捨之間則便當見月云指直下一刀兩段若更遲疑思前筭後則乃是空拳指上生實解根境法中虛捏怪於陰界中妄自囚執無有了時近年以來有一種邪師說默照禪教人十二時中是事莫管休去歇去不得做聲恐落今時往往士大夫爲聰明利根所使者多是厭惡閑處乍被邪師輩指令靜坐却見省力便以爲是更不求妙悟只以默然爲極則某不惜口業力救此弊今稍有

知非者顧公只向疑情不破處參行住坐卧不得放捨僧問趙州狗子還有佛性也無州云無這一字子便是箇破生死疑心底刀子也這刀子柄只在當人手中教別人下手不得須是自家下手始得若捨得性命方肯自下手若捨性命不得且只管在疑不破處崖將去蓦然自肯捨命一下便了那時方信靜時便是閑時底閑時便是靜時底語時便是默時底默時便是語時底不著問人亦自然不受邪師胡說亂道也至禱至禱昔朱世

武六

英嘗以書問雲菴真淨和尚云佛法至妙日用如何用心如何體究望慈悲指示真淨曰佛法至妙無二但未至於妙則互有長短苟至於妙則悟心之人如實知自心究竟本來成佛如實自在如實安樂如實解脫如實清淨而日用唯用自心自心變化把得便用莫問是之與非擬心思量早不是也不擬心一天真一一明妙一一如蓮華不著水心清淨超於彼所以迷自心故作衆生悟自心故成佛而衆生即佛佛即衆生由迷悟故有彼

此也如今學道人多不信自心不悟自心不得自心明妙受用不得自心安樂解脫心外妄有禪道妄立奇特妄生取捨縱修行落外道二乘禪寂斷見境界所謂修行恐落斷常坑其斷見者斷滅自心本妙明性一向心外著空滯禪寂常見者不悟一切法空執著世間諸有爲法以爲究竟也邪師輩教士大夫攝心靜坐事事莫管休去歇去豈不是將心休心將心歇心將心用心若如此修行如何不落外道二乘禪寂斷見境界如何顯得自

心明妙受用究竟安樂如實清淨解脫變化之妙須是當人自見得自悟得自然不被古人言句轉而能轉得古人言句如清淨摩尼寶珠置泥潦之中經百千歲亦不能染汙以本體自清淨故此心亦然正迷時爲塵勞所惑而此心體本不曾惑所謂如蓮華不著水也忽若悟得此心本來成佛究竟自在如實安樂種種妙用亦不從外來爲本自具足故黃面老子曰無有定法名阿耨多羅三藐三菩提亦無有定法如來可說若確定本體實

有恁麼事又却不是也事不獲已因迷悟取

捨故說道理有若干爲未至於妙者方便語耳其實本體亦無若干請公只恁麼用心日用二六時中不得執生死佛道是有不得撥生死佛道歸無但只看狗子還有佛性也無趙州云無切不可向意根下卜度不可向言語上作活計又不得向開口處承當又不得向擊石火閃雷光處會狗子還有佛性也無無但只如此參亦不得將心待悟待休歇若將心待悟待休歇則轉沒交涉矣

又

示諭自得山野向來書之後每遇閑中禪避不得處常自點檢而未有著力工夫只這禪避不得處便是工夫了也若更著力點檢則又却遠矣昔魏府老華嚴云佛法在日用處

武六

行住坐卧處喫茶喫飯處語言相問處所作所爲處舉心動念又却不是也正當禪避不得處切忌起心動念作點檢想祖師云分別不生虛明自照又龐居士云日用事無別唯吾自偶諳頭頭非取捨處處勿張乘朱紫誰

爲號立山絕點埃神通并妙用運水及搬柴

又先聖云但有心分別計較自心見量者悉

皆是夢切記取禪避不得時不得更擬心不

擬心時一切現成亦不用理會利亦不用理
會鈍總不干他利鈍之事亦不干他靜亂之

事正當禪避不得時忽然打失布袋不覺拊
掌大笑矣記取記取此事若用一毫毛工夫
取證則如人以手撮摩虛空只益自勞耳應
接時但應接要得靜坐但靜坐坐時不得執
著坐底爲究竟今時邪師輩多以默照靜坐

爲究竟法疑惑後昆山野不怕結怨力試之
以報佛恩救末法之弊也

答趙待制道夫

示諭一一備悉佛言有心者皆得作佛此心
非世間塵勞妄想心謂發無上大菩提心若
有是心無不成佛者士大夫學道多自作障
難爲無決定信故也佛又言信爲道元功德
母長養一切諸善法斷除疑網出愛流開示
涅槃無上道又云信能增長智功德信能必
到如來地示諭鈍根未能悟徹且種佛種子

於心田此語雖淺近然亦深遠但辦肯心必
不相賺今時學道之士往往緩處却急急處
却放緩龐公云一朝蛇入布襪武六嘗試問宗師
甚時節昨日事今日尚有記不得者況隔陰
事豈容無忘失耶決欲今生打教徹不疑佛
不疑祖不疑生不疑死須有決定信具決定
志念念如救頭然如此做將去打未徹時方
始可說根鈍耳若當下便自謂我根鈍不能
今生打得徹且種佛種結緣乃是不行欲到
無有是處果每爲信此道者說漸覺得日用

二六時中省力處便是學佛得力處也自家
得力處他人知不得亦拈出與人看不得盧
行者謂道明上座曰汝若返照自己本來面
目密意盡在汝邊是也密意者便是日用得
力處也得力處便是省力處也世間塵勞事
拈一放一無窮無盡四威儀內未嘗相捨爲
無始時來與之結得緣深故也般若智慧無
始時來與之結得緣淺故也乍聞知識說著
覺得一似難會若是無始時來塵勞緣淺般
若緣深者有甚難會處但深處放教淺淺處

放教深生處放教熟熟處放教生纔覺思量
塵勞事時不用著力排遣只就思量處輕輕
撥轉話頭省無限力亦得無限力請公只如
此崖將去莫存心等悟忽地自悟去參政公
想日日相會除圍碁外還曾與說著這般事

武六

十三

否若只圍碁不曾說著這般事只就黑白未
分處掀了盤撒了子却問他索取那一著若
索不得是真箇鈍根漢姑置是事

答許司理

壽源

黃面老子曰信爲道元功德母長養一切諸

善法又云信能增長智功德信能必到如來
地欲行千里一步爲初十地菩薩斷障證法
門初從十信而入然後登法雲地而成正覺
初歡喜地因信而生歡喜故也若決定豎起
脊梁骨要做世出世間沒量漢須是箇生鐵
鑄就底方了得若半明半暗半信半不信決
定了不得此事無人情不可傳授須是自家
省發始有趣向分若取他人口頭辨永劫無
有歇時千萬十二時中莫令空過逐日起來
應用處圓陀陀地與釋迦達磨無少異自是

當人見不徹透不過全身跳在聲色裏却向

裏許求出頭轉沒交涉矣此事亦不在久參

知識徧歷叢林而後了得而今有多少在叢
林頭白齒黃了不得底又有多少乍入叢林
一撥便轉千了百當底發心有先後悟時無

先後昔李文和都尉參石門慈照一句下承
當便千了百當嘗有偈呈慈照云學道須是
鐵漢著手心頭便判直取無上菩提一切是
非莫管但從脚下崖將去死便休不要念後
思前亦不要生煩惱煩惱則障道也祝祝

又

左右具正信立正志此乃成佛作祖基本也
山野因以湛然名公道號如水之湛然不動
則虛明自照不勞心力世間出世間法不離
湛然無纖毫透漏只以此印於一切處印定

武六

十四

無是無不是一一解脫一一明妙一一實頭
用時亦湛然不用時亦湛然祖師云但有心
分別計較自心見量者悉皆是夢若心識寂
滅無一動念處是名正覺覺既正則於日用
二六時中見色聞聲艷香了味覺觸知法行

住坐卧語默動靜無不湛然亦自不作顛倒
想有想無想悉皆清淨既得清淨動時顯湛
然之用不動時歸湛然之體體用雖殊而湛
然則一也如析栴檀片片皆栴檀今時有一
種杜撰漢自己脚跟下不實只管教人攝心
靜坐坐教絕氣息此輩名爲真可憐愍請公
只恁麼做工夫山野雖然如此指示公真不
得已耳若實有恁麼做工夫底事即是汙染
公矣此心無有實體如何硬收攝得住擬收
攝向甚處安著既無安著處則無時無節無

古無今無凡無聖無得無失無靜無亂無生
無死亦無湛然之名亦無湛然之體亦無湛
然之用亦無恁麼說湛然者亦無恁麼受湛
然說者若如是見得徹去徑山亦不虛作此
號左右亦不虛受此號如何如何

武六

十五

大慧普覺禪師書卷第二十六